






1  
2 inc
















# HISTOIRE

AV VRAY DV MEVRTRE

& Assassinat proditoirement cōmis au cabinet  
d'un Roy perfide & barbare, en la personne  
de Monsieur le Duc de Guise, Protecteur &  
Deffenseur de l'Eglise Catholique & du  
Royaume de France: Ensemble du massacre  
aussi perpetré en Monsieur le Cardinal, son  
frere, sacré & dedié à Dieu:

Où sont balancē les seruices de leurs Predeces-  
seurs & ceux qu'ils ont faits, avec vne  
tant inhumaine cruauté & in-  
grate remuneration.

Pour estre le tout veu & diligemmet con-  
sideré par gents de bien.

De nouueau reueüe & augmentee des trahisons conspi-  
rees (mais en vain par la prouidence diuine) contre  
Messeigneurs les Ducs de Mayenne & d'Anmale:  
avec les pourtraits des massacres desdits Seigneurs de  
Guise & Cardinal.

M.D. LXXXIX.

Case

F

39

.326

1589 li

THE NEWBERRY  
LIBRARY

HISTOIRE AV VRAY DV  
MEVRTRE ET ASSASINAT  
*perfidement & proditoirement commis  
au Cabinet du Roy, en la personne de  
Monsieur le Duc de Guise, & par apres  
de Monsieur le Cardinal, son frere: Pro-  
tecteurs & Deffenseurs de l'Eglise Ca-  
tholique, & du Royaume de France.*

**L** Es traiçts perfides, inhumains & de-  
testables par lesquels cét Illustre,  
Magnanime & Inuincible Duc de  
Guise a souffert mort cruelle & indi-  
gne de sa valeur, sont tels qu'on ne les peut dire sans  
larmoyer: Et neantmoins cessans les pleurs & repré-  
nant courage, il est besoin les escrire pour en aller  
par apres aux mains, & vanger vne telle & insigne  
trahison executée en vn cabinet de Roy, se disant  
tres-Chrestien, sous son auctorité & par luy-mes-  
me, nō seulement en la personne dudit Seigneur Duc  
de Guise, mais aussi attentée purement contre Dieu  
& son Eglise en celle d'un Cardinal sacré: l'un &  
l'autre fideles Propagateurs & Deffenseur de la Re-  
gion Chrestienne.

Nul est ignorant que ledit Seigneurs a fait infinis  
seruices par cy deuât à nos Roys de Frâce, tant pour  
l'extirpation des heresies, que pour maintenir leur  
Couronne & soulager le pauvre peuple: comme aussi

parauant luy, d'ancienneté: les Princes, ses tres-Illustres Predecesseurs luy en ont louablement monstré le chemin: En quoy tant s'en faut, qu'il ait aucunement degeneré, qu'il semble en cela les auoir quasi surpassé en tout.

Et afin de venir iusques à l'heure, qu'il a ainsi esté cruellement massacré dans le cabinet d'un Roy perfide; le diray succinctemēt en remuneration de quels bien-faits & fidelles seruices; il a receu vne recompense tant prodigieuse & detestable.

Laisant à parler des Roys & Princes, ses heroïques Predecesseurs, qui ont rendu tant grâds deuoirs à l'Eglise Catholique, ie noteray seulement que pendant le regne du Roy François, premier, messieurs de Lorraine & de Guise, luy ont faict paroistre de quel zele ils ont embrassé fidellement sa querelle, à l'encontre des ennemis de son Royaume.

Claude de Lorraine, Comte de Guise & d'Aumale (lequel en l'an 1513. auoit espousé à Paris, Antoinette de Bourbon, sœur de Charles, Comte de Vendosme) estoit à la bataille de Marignan, que le Roy François gaigna allencontre des Suisses, au commencement de son regne, qui fut en l'an 18.

En l'an 22. ensuiuant, ledit Seigneur de Guise assembla des forces avec le Comte de saint Paul, à Peronne, & furent assaillir Bapaume; prindrent la ville & le Chasteau: & passans outre, s'acheminās au passage de l'Escluse, pour entrer au pays d'Astreuuant, entre les riuieres de l'Escau & de Carpes, y trouuerēt les ennemis assemblez pour garder le pas, lesquels ils forcerent, & les mettans à vau de route les chasserent iusques dedans les portes de Douay,



5

en ce combatant. François monsieur de Lorraine, frere desdits Seigneurs de Lorraine & de Guise, n'ayant attainé seulement que l'age de 16. à 17. ans porta là ses premieres armes, & y feit assez paroistre la force & magnanimité de son inuincible courage.

L'annee d'apres, qui fut 23. le dit Seigneur de Guise, Lieutenant du Roy en Bourgogne, Ainsi que les Comtes Guillaume de Fustemberg & Felix (conduits par la Morre des Noyers, pour le Duc de Bourbon, deslors retiré de France) eurent prins par composition Coiffi & Monteclair, sur le Roy, Il assemblea quelques troupes de gens d'armes, cōtraignit les Comtes susdits à se retirer: & au passage de la Meuse il deffist vne grande partie de leur armee, leur faisant quitter le butin qu'ils emmenoyent.

Le susdit François de Lorraine fut occis à la bataille de Pauie, conduisant les Lansquenets, lesquels, à son exemple, se firent tailler en pieces, plustost que de reculer: en sorte que si les Suisses eussent autant vaillamment combatu, la victoire estoit douteuse, & le Roy n'eust esté prins prisonnier.

Peu après la prise du Roy à Pauie. se leua en Allemagne vne populace, laquelle maintenoit que tous biens estoient communs, & sous ce pretexte s'assemblerent quatorze ou quinze mille hommes, pour venir en France, estimans y pouuoir tout subiuguer; ayans opinion que la Noblesse de France estoit morte à la bataille de Pauie; Et ces paysans ainsi assemblez pilloyent les maisons des Gentils-hommes, par où ils passoyent, tuoyent femmes & enfans, avec cruautéz inusitées. Pour à quoy obuier Monsieur de Guise & le Comte de Vaudemont, son frere, as-

semblas les garnisons de Bourgogne & de Champagne, s'opposerent aux incursions de ces rauageurs, les chargerent, deffirent & en taillerent en pieces huit à dix mille, au pied de la montagne de Sauerne: le reste se sauua à la fuite.

François de Lorraine, Duc de Guise (lequel fut proditoirement tué au siege deuant Orleans, par Poltrot) porta ses premieres armes en l'an 1543: à vn raitaillement de Therouane: l'on l'appelloit lors Seigneur d'Aumale, fils aîné de Claude cy dessus nommé, Comte de Guise (car Guise a esté seulement erigee en Duché en l'an 50. viuât encores ledit Claude.) Pendât ce raitaillemēt & apres il feit plusieurs belles entreprises tant deuant Aire que saint Omer, & pour vn coup il amena plus de cent hōmes de cheual prisonniers dedans Therouane: estant lors Capitaine de cinquante hommes d'armes.

Il fut cause de la prinse de Liliers, place forte, pres Aire, & depuis, avec ledit seigneur de Guise, son pere, il accompagna tousiours le Roy à la guerre, au pays d'Arthois, lors que furent prins Landrecy, Bapaume, Maubeuge, & autres fortes places. Il feit merueilleusement cognoistre sa valeur au siege deuant Auesnes, & alors que pres de Landrecy fut pris prisonnier le Lieutenant du Comte de Roquendolf.

Depuis la mort de Claude de Lorraine, Duc de Guise, François de Lorraine, son fils aîné, & ses freres, avec le Comte de Vaudemont, leur oncle, seruirent le Roy Henry, 2. & l'accompagnerent au recouurement de Boulongne, d'où furent chassés les Anglois. Là Mōsieur de Guise, François de Lorraine, d'eternelle recommandation, y fut blessé outrageu-

semēt en la teste d'un coup de lance, le fer de laquelle luy demeura dedans fort auant, & au milieu de la meslee fut tiré pour mort: toutesfois par vn singulier miracle & benefice de Dieu, il fut reserué pour plus grâdes affaires; qu'il a depuis executees pour la conseruation & augmentation du Royaume, à la honte & confusion de nos ennemis, pendant le regne du feu Roy Henry (que Dieu absolue:) Et depuis ayant fait grand deuoir (mesme perdu la vie) pour l'extirpation des heresies de ce Royaume. Aussi avec les Illustres Princes, ses parens, il accompagna le Roy fidelement en l'expedition des Mets, & durant le voyage de Luxembourg, és années 51. & 52.

En ce temps le Seigneur d'Aumale, son frere, estoit general de la caualerie legere. Et peu apres estans venues nouuelles en France, que l'Empereur faisoit amas de gens de guerre en Allemagne, doutant que ce ne fust (comme on craignoit) pour venir assieger la ville de Mets, Le Roy se confiant grandement en monsieur de Guise, cognoissant son trauail aux affaires de guerre, sa magnanimité és dangers, son conseil à deliberer, son auctorité, industrie & promptitude à executer, il le voulut choisir entre tant de Princes qu'il auoit lors à sa Cour, & l'enuoya à Mets afin de pourueoir en toute diligence à la fortification d'icelle, & y commander: Laquelle non seulement ledit seigneur de Guise fortifia & pourueut de toutes choses necessaires, mais d'auantage il la garda, & deffendit (avec peu de perte des siens) contre toutes les forces que peut assembler le plus grand Prince de l'Europe, qui y estoit en personne: duquel il souffrit vaillamment tous les furieux assaux: & en fin il



le contraignit honteusement , à leuer le siege : avec perte de plus de moitié de son armee, montant à environ soixante mille hommes.

Sur la fin de l'annee 53. apres la perte de Therouane & Hefdin, ledict sieur de Guise accompagna tousiours le roy au pays bas de l'Empereur, lors que furent prins Mariembourg, Dinan, Yuoy, Mommedy & autres places: Et avec le Sieur d'Aumale luy fait plusieurs seruices notables.

En 54. ayant le roy , en personne enueloppé de son armee le Chasteau de Renty , l'Empereur n'en eüst loing delibera de le secourir & desgager, à quelque peril que ce fust: Et estant le plus fort il presenta le combat aux François, & auoir commencé à bien esbranler l'auantgarde & se promettoit la victoire, lors que monsieur de Guise (commandant à la Bataille) reioignit à soy les premieres forces ja fuyardes, Et avec l'ayde du Comte d'Aumale , son frere, General de la caualerie legere , comme nous auons dit, chargea les ennemis tant furieusement, qu'il ouurit & enfonça les Pistolliers de l'Empereur, lesquels d'eux mesmes rompirent le bataillon de leurs Lansquenets: qui fut cause que leur harquebuzerie d'Espagnols fut en partie deffaite & mise à vau de route dans vn bois. Là furent prinſes & leuees des ennemis dix & sept enseignes de gens de pied , cinq cornettes de caualerie, & quatre pieces d'artillerie de campagne. Sans ce reuers de fortune l'Empereur se promettoit iouyr aussi bien du roy , que le Marquis de Pescare, pour luy, auoir fait du roy François deuant Panie.

En l'an 56. estant ledit Sieur Duc de Guise Lieutenant



ténat general, pour le Roy, del'armee qu'il enuoyoit en Italie (afin d'aller secourir le Pape Paul, quatriesme, assailly des forces que l'Empercur y auoit enuoyees conduites par le Duc d'Albe) accompagné de Messieurs d'Aumale & Marquis d'Elbeuf, ses freres, durant la force de l'hyuer, au mois de Decembre; Il passa avec grands labeurs & traux les montagnes de Sauoye & les Alpes, & fit tant grande diligence, qu'en peu de iours ayant passé tout le Piémont il se trouua bien auant en Lombardie, où il emporta d'assaut la ville de Valée, sur le Thesin, & intimida tellement le Duc d'Albe, estant deuant Rome, qu'il luy donna occasion de leuer son siege, & se retirer au Royaume de Naples: de sorte que le Sieur Pierre de Stroffi, Marechal de Frâce, qui estoit party des premiers, & qui s'estoit enfermé dedans Rome, pour soustenir le siege & deffendre la personne du Pape & la ville, auant que monsieur de Guise fut arriué, peut commencer a reprendre la pluspart des forts que les Imperiaux auoient basty & remparé à l'entour de Rome & du Tybre. Le Pape par ce moyen fut remis en liberté, & ceste tres-anciéne ville, avec toute la Prouince circonuoisine rassuree & ostee de captiuité.

Ce pendant que ledit Sieur de Guise estoit empesché par le comandement & pour le seruice du Roy en Italie, afin de sauuer le Pape des mains des Imperiaux. Le Roy Philippe d'Angleterre, auoit secretement dressé des forces suffisantes pour executer vne haute entreprinse, parauant que le Roy (ne s'en donnant de garde) eust peu mettre ordre à ses affaires. Et de fait au mois d'Auril de l'an 57. il pense faire sur-

prendre Rocroy, estimant que par les frontieres de Champagne, qu'il cognoissoit estre foibles, il pourroit plus aisément entrer en France & estonner grandement le Royaume. Cela feit rompre les trefues. Les ennemis font semblât d'aller à Rocroy, viennent vers Guise, la font monstre d'une armee de plus de cinquante mille hommes, attendans encores huit à dix mille Anglois qui descendoient en la Comté d'Oye, lesquels les vindrent par apres trouuer deuant saint Quentin, qu'ils assiegerent. Durant ce temps le Roy fait amas du plus de force qu'il peut, en si peu de iours: Il enuoye l'Admiral dedés saint Quentin, & luy r'enuoye encores par apres le sieur d'Andelot son frere, cōduisant deux mille harquebuziers, qui furent en chemin deffaits par les ennemis. Monsieur le Connestable, y va avec les forces du Roy pour faire leuer le siege, Il perd la bataille dite de saint Laurens, en laquelle est occis Monsieur d'Angnien, Prince du sang, & plusieurs grands personages, Monsieur le Connestable y est prisonnier, & autres infinis, & quasi toute l'artillerie perdue. La ville de saint Quentin est prinse le 27. d'Aoust, estât le Roy Philippe arriué en son camp peu auparauant: L'Admiral aussi est prisonnier. Le Chastelet est prins & Ham par apres le 12. de Septembre. Les Parisiens se trouuent fort estonnez, & neantmoins prenans courage, n'oublans iamais leur deuoir enuers les Roys Tres-Christiens, ils feirent present au Roy de trois cens mille liures, pour luy ayder à remettre sus nouvelles forces.

Le Baron de Poleuille, pour le roy Philippe, assailloit d'autre costé le pays de Bresse: Somme toute

la France estoit si esbranlée.

En ce mesme temps la paix se commence à traicter entre le Pape, s'estant l'Empereur desmis parauant de ses Estats : A cause dequoy & du grand besoin que l'on auoit en France de monsieur de Guise, le Roy le manda reuenir en la plus grande diligence qu'il pourroit. Ce qu'il feit, renuoyant vne partie de son armee sous la conduite de monsieur d'Aumale, par les terres du Pape deuers Boulongne & à Ferrare, & de là par les Grisons & par les Suisses. Ceste partie d'armee deliura la ville de Bourg assiegee, & tout le pays de Bresse, faisant retirer le Baron de Polleuille. Monsieur de Guise estoit embarqué à Honniet, dedans les galeres de France, & vint ce pendant le plus subitement qu'il peut trouuer le Roy à saint Germain en Laye, lequel le feit Lieutenant general en tout son Royaume, & l'enuoya à Compiègne disposer & commander sur l'armee qu'il y auoit commencé à remettre sus.

Monsieur de Guise se trouuant à Compiègne en l'armee du Roy, avec messieurs ses freres les Comte d'Aumale, & marquis d'Elbeuf, & autres Seigneurs François, il y donna vn tel ordre qu'en la fin de Nouembre elle fut parfaitement accomplie de tout attirail & munitions, pour estre promptement employee : Iugeant sagement que de l'aller aheurter aux rempars & fortifications de Ham, & saint Quentin, pour essayer de faire effort à les reprendre, c'eust esté adiousté seconde ruyne a la premiere, & comencer besongne au souhait, peut estre de l'ennemy : eu esgard que se doutant de ceste deliberation, il auroit muni ces places tellement, que sans remuer



lez armes, il seroit spectateur à voir les François estre deffaits & combatus du froid & de la famine, estant desia l'huyuer du tout venu, & le pays circonuoisin degradé, bruslé & destruit.

Cela considéré, & ayant preuë à ce qu'il auoit intention de faire: afin d'amuser l'ennemy ailleurs, par vne feinte, fut baillee partie de ceste armee à monsieur de Neuers, pour mener en Champagne, faisant courir le bruit que c'estoit pour aller prendre Luxembourg & Arlon: Et que monsieur de Guise, avec l'autre moitié, demeureroit en Picardie pour empescher l'ennemy d'aitailler saint Quentin & Ham. Les ennemis aduertis de ce, scachās que le Duché de Luxembourg estoit degarny de gens de guerre: departirent quant & quant vn secours de gens & munitions pour y enuoyer en toute diligence: monsieur de Guise alors s'auance deuers Amiens, faignāt vouloir aitailler Dourlan, & en toute diligēce mādē à monsieur de Neuers luy ramener ses forces, & ce pendant passe outre Dourlan, sous ombre d'aller pareillement munir & raitailler Ardres & Boulogne: retenant en ceste sorte l'ennemy en doute de ce qu'il vouloit attenter tout à vn coup.

Après qu'à grādes iournees les troupes de monsieur de Neuers furent atriuees & reiointes a monsieur de Guise suivant sa tresgrāde promptitude, le premier iour de Ianier il se presenta deuant le fort de Nieullay rompt vne Pallissade que les Anglois auoient basty à vn lieu de S. Agathe, & les contrainst se retirer à Nieullay. Des l'heure, jātard, Monsieur de Guise recognoit ce fort, se fit commencer les approches, faire les trenchées, mener l'artillerie & la loger, pour

dés que le iour poindroit commencer à le battre. Et par ce que tout le fruit de l'effect requeroit vne tres-grande promptitude, afin de rendre les assigez entièrement estonnez, & sans loisir de s'asseurer & recognoistre, & hors despoir de pouuoir estre secourus : de mesme train ce Prince auoit fait marcher vne partie de son armee & artillerie à main gauche, le long des Dunes, pour les occuper, & gagner vn autre fort appellé Risban, lequel commande & tiët subiect tout le port, & empesche qu'il n'y peut aborder aucun vaisseau ennemy. L'artillerie est prestee contre lesdits forts, laquelle estonna si bien les assigez, que ceux du pont de Nieullay quitterent incontinent la place, à grand haste se retirerent dans Calais. Vne heure ou deux apres la prise du fort de Nieullay, ceux qui estoient dans celuy de Risban se rendirent aussi : Parquoy ce Prince poursuiuant de pres l'heureuse occasion de la conqueste de Calais, le 4. de Ianuier il la fait canoner & se saisit du Cay d'icelle, prend le Chasteau, & finalement ceux de Calais venans à composition ne pouuans plus tenir, la luy rendent le huiëtiesme iour de Ianuier 1557.

(qui seroit 58. selon que nous comptons maintenant.) En ceste sorte en moins de six ou sept iours, ce Prince reconquesta toute la forteresse de Calais, & en autres peu de iours le fort de Hames, la ville de Guines, vne autre place merueilleusement forte, nommee la Cuue de Guines, & generalement tout ce qui de pend de la Côte d'Oye; chassant par ce moyen les Anglois hors de France, lesquels pendant le regne d'Edoart, 3. auoient Conquesté Calais sur Philippe de Valois (apres que les François eurent perdu la ba-

taille de Crecy, en laquelle mourut quasi toute la noblesse de France) ayant esté assiegée par l'espace d'un an entier, sans que les François, estans dedans, eussent eu aucun secours d'hommes ny de viures, qui fut cause que mourans de faim, ils la rendirent aux Anglois le 3. d'Aoust, en l'an 1347. qui en auroient iouy le terme de deux cens deux ans: tellement qu'ayant esté prinse par les Anglois sur un roy de France nommé Philippe, monsieur de Guise, pour un roy de France l'auroit reprise sur un roy d'Angleterre aussi nommé Philippe.

Ceste conqueste faicte en si peu de temps, & d'une chose qu'on estimoit come impossible, & que pour icelle le roy eust voulu auoir donné dix millions d'or, Est nombree entre les miracles & cas esmerueillables de ce siecle: aussi elle feit bien rabattre l'orgueil des ennemis à cause de la faueur que la fortune leur auoit prestée au pays de Santerre, en l'Esté precedent.

Depuis le roy continuant tousiours la guerre contre le roy Philippe, monsieur de Guise Lieutenant general pour sa Majesté, se trouue à Mets sur la fin du mois de May 58. avec vne assez bonne armee, va mettre le siege deuant Thionuille aux frontieres de Mets, place de tresgrande importance, qu'on estimoit aussi imprenable: la feit friueusement canonier, & la reduisit à telle extremite que les assiegez au mois de Iuin ensuiuant furent contrains la mettre entre ses mains, avecques le Chasteau.

Et ce Prince poursuiuant sa victoire prend Arlon qu'il fait desmanteler, & ruyné tout le pays de Luxembourg retire en son armee en Picardie, à cause de



la perte de la bataille de Grauelmes par Monsieur de Termes, Empesche que l'ennemy entreprenne sur les frontieres; & fait tousiours de grands seruices, iusques à ce que la paix fut concludue à Chasteau en Cambresis.

Après la mort du Roy Henry, 2. luy ayant succédé François, 2. son fils aîné, plusieurs motifs d'une longue guerre ciuile se preparerent en France, d'autant que; outre le naturel belliqueux de la nation Françoisse ce Royaume estoit plein d'hommes, nourris & accoustumez aux guerres estrangeres, nouvellement pacifiees; lesquels au moyen de la paix demeuroyent sans parti, & plusieurs grands Seigneurs & Capitaines se mal-contentoyent, par ce que la mort subite & inesperee du Roy Henry leur auoit esté l'esperance d'estre recompensez de leurs seruices, mesprisans le bas aage de leur nouveau maistre: & qui pis est, ceux de la religion nouvelle, depuis nommez Protestans ou huguenots, se sentans forts d'hommes, en tres-grand nombre, & de tous estats, desiroyent secouer le ioug des punitions & supplices sous lequel les Roys precedens les auoyent tenus, & se vouloyent mettre en pleine liberte. A ces causes le peuple faisant profession de religion nouvelle recoura bien aisément des chefs, fort signalez, qui eurent gents & moyens assez pour au dommage public poursuiure leur intention: Pour aquoy paruenir ils conspirent l'entreprise qu'ils ne peurent executer à Amboise au mois de Mars, 1560. Le Roy, au mesme temps & apres ce tumulte, declare encores François de Lorraine, Duc de Guise, son oncle, grand Maistre & Châbellan de France, Lieute-

nant general pour la Majesté en tout son Royaume, tant pour cause de l'experience notoire qu'auoit ce Princeau manimēt des affaires de paix & de guerre, ioincte avecques sa fidelité, que par la recommandation qu'il en auoit eue du feu Roy, son pere. Le Prince de Condé est soupçonné du tumulte passé; il est fait prisonnier. Le Roy François, 2. estant mort, pendant les Estats cōmencez à Orléans, le Prince est tiré hors de prison; & au commencement du regne du Roy Charles, 9. il est déclaré innocent des cas à luy imposez. Et neantmoins il tache en apres par tous moyēs de supplanter la Religion Catholique: Il demande le Colloque de Poissi, où il fait venir plusieurs ministres de la nouuelle opinion. Messieurs de Sorbonne, Messieurs les Cardinaux de Tournon, de Lorraine & de Guise, & autres Ecclesiastiques s'y opposent. Rien n'y est arresté, ains le tout remis à vn Concile general, qui fut cause que les Huguenots se saisirent des Temples & prescherent par les villes.

La Roynie mere du Roy voulut faire dresser vn Edit provisionnel pour le reiglement des Protestans, leur promettāt de faire exercice de leur religion & prescher hors les villes: ce qui despleust merueilleusement aux principaux Catholiques, qui disoient qu'on vouloit par ce moyen paruenir à vn interim, & abolir en fin la religion Catholique. Que ce n'estoit le moyen d'assopir les troubles, lesquels ne procedoient que de la facilité de ceux qui auoient donē entree si aisée aux Heretiques, pour y plāter leurs faulces opinions, & de la paresseuse cōiuence des Magistrats & officiers de Iustice, qui ne se seroient mōstrez assez roides à rondemēt executer les Edits si sainctement & solennellement



solemnellement faits contre les Lutheriens. Adioustant que si les moyens d'extirper les heresies tenus par les predecesseurs Rois, eussent esté suiuis, que l'on ne fust tombé en ces fautes, & que le seul moyen estoit de les reprendre, chasser tous ministres, & ne permettre plus d'assemblees; par ce moyen qu'il seroit facile de garder l'ancienne Religion en son entier. Ce que la Roynne toutesfois ne trouua bon.

Surquoy les principaux, entre autres messieurs de Guise, luy dirent qu'ils aimoient donc mieux eux en aller de la Cour, ce qu'ils firent.

Pendant leur absence les Huguenots font faire presches aux faux-bourgs de Paris, & vn iour des festes de Noel saccagent l'Eglise saint Medard, & peu apres leur est accordé l'Edict de Ianuier, tant preiudiciable à l'Eglise Catholique, & cause de tous les maux qui sont suruenus depuis. Le Prince de Condé estant à Paris, se ligue avec ceux de la nouuelle opinion, s'accompaignant de plus grande suite de gentilshommes que de coustume. Messieurs de Guise n'ont donc point esté cause des troubles accreuz, & tant enracinez pour le fait de la Religion, qu'il est quasi impossible de les desraciner.

Ceste immoderee licence que les Huguenots s'accreeurent à Paris, causa que les habitans Catholiques d'icelle en firent grandes plaintes à la Roynne mere du Roy, & au Roy de Nauarre, parquoy incontinent ils appellerent en Cour messieurs de Guise & monsieur le Connestable, afin qu'ils les aidassent de leur conseil à pacifier, ou de leur vaillance en necessité de guerre. Les Huguenots nommēt Triumvirat l'association que feit le Roy de Nauarre avec messieurs

le Connestable & de Guise , pour la dëffense de la Religion Catholique & de l'Estat du Roy. Monsieur de Guise ne vint si tost en Cour que le Connestable, & n'y voulut venir , par ce qu'il vouloit laisser decliner la ialousie de quelques grands, lesquels publioyent que sa presence occasionoit les troubles: mais ayant expres commandement du Roy & de la Roynne mere, avec lettres amiables du Roy de Nauarre & du Connestable, ioinct la necessitë de secourir la cause de Dieu, le Roy & la Patrie, il s'achemina en cour avec moyenne suite. Et le premier iour de Mars 1561. (ou 62. selon que nous contons maintenant) passant par Vassi, place de son gouuernement, les Huguenots amassez en vne granche pour faire leur presche, s'enhardirent d'iniurier sa suite, voire luy-mesme, dont s'ensuiuit vne meslee, ou quelques Huguenots furent tuez, blessez, & les autres mis en suite. De là les Protestans prennent le faict de Vassi pour vn pretexte de leuer les armes, demandent iustice au Roy, & menacent le Duc de Guise, non tant pour ceste cause, que par ce qu'ils le scauoient totalement bon Catholique, & contraire à leur opinion nouuelle. Ce pretexte n'estoit suffisant afin d'entreprendre & se licencier à voller les trefors des Eglises, les abbattre & du tout ruiner, se saisir des meilleures villes de Frâce & y introduire les estrangers: Mais par là on cognoist assez qu'ils en vouloient à la religion & au Roy & au pays.

Monsieur de Guise approchant de la cour & estât arriué à Nantueil, monsieur le Connestable l'alla visiter en ce lieu, & estant accompagné de messieurs d'Aumale, Marechal de saint André & de Ran-

dan, l'amena à Paris, où il estoit attendu en grande deuotion par les Catholiques, & y fut receu fort agreablement par le Preuost des Marchans, qui luy alla au deuant. Le Prince de Condé estoit aussi pour lors à Paris, & ceste mesme apresdinee le presche se faisoit sur les fossez de la porte saint Iacques, où le Prince de Condé fut, accompagne de quatre ou cinq cens cheuaux, de sorte que presque en vn mesme tēps que monsieur de Guise entroit en la ville par la porte saint Denis, le Prince qui auoit son logis en la rue de Grenelle passoit à l'opposite vers la mesme porte saint Denis, tous deux bien accompagnez, & falloit que ces deux trains se rencontraissent en partie: Ce qui faisoit douter à plusieurs qu'il y auroit mauuaise rencontre, par ce que ce iour mesme les ministres auoient esté receuz & presté le serment en Chastelet, suiuant l'Edict de Ianuier: Mais ils passerent outre s'entre-saluant. Le Roy estoit pour lors à Fontaine-bleau où la Royne sa mere l'auoit mené, craignant que le Prince de Condé, l'Admiral & autres leurs complices ne se saisissent de sa Maiesté, comme leur deliberation en estoit. Le Roy de Nauarre vient à Paris afin de conclure des affaires avecques les chefs Catholiques, lesquels ayans recours à Dieu, font faire procession generale à sainte Geneuiefue. Le Prince de Condé voyant que grand nombre de gens de guerre Catholiques affluoiēt à Paris, que les armes qu'on auoit fait oster à la populace leur auoient esté rendues, que le peuple murmuroit contre luy, & qu'il estoit la le plus foible, Partit de Paris, & bien accompagné s'en alla à Meaux, où bien tost arriuerent l'Admiral & d'An-



delot, aussi fort accompagnez, bien marris de n'auoir peu ioindre le Prince dedans Paris où ils faisoient estat de l'arrester & en chasser monsieur de Guise, lequel plus auisé à garder ses aduantages, ne sceust pluſtoſt le Prince estre sorty, qu'il ne ſeit mettre bonnes gardes aux portes. Et pour ſe mieulx aſſeurer du dedans, ſeit leuer nombre de compagnies par la ville, ſans toutesfois empescher (ce qu'il ſeit ſagement afin de ne cauſer vn tumulte en la ville) l'exercice des huguenots, ſuiuant l'Edict: Ces ennemis Proteſtans ainſi assemblez à Meaux, les Seigneurs Catholiques, craignans qu'ils ne ſ'emparaſſent de la perſonne du Roy, de ſes freres & de la Mere, les allerēt querir en diligence à Fontainebleau, & les amenèrent à Melun, pour les tenir en ſeureté dans le Chasteau. Tandis le Prince eſcriuit de tous coſtez aux Proteſtans qu'ils euſſent à ſe ſaiſir des villes & paſſages: le plus que faire ſe pourroit: ce qu'ils font par tout le Royaume, voire des meilleures villes: prennent pluſieurs grands perſonnages, dont ils en font mourir aucuns, pillent les Eglises, rompent les images, & ſaiſiſſent les finances du Roy. D'auantage, ſe lians avecques les Proteſtans d'Allemagne, y font de grandes leues de gens de guerre, & en aſſemblerent autres de tous endroits.

Les Princes & Seigneurs Catholiques, d'autre part, ne voulans ſouffrir en France aucune diuerſité de religion, font aussi leues & amas de forces du Royaume, & demandent ſecours de gens & d'argent au Pape & au Roy d'Eſpagne: Et ayans dreſſé vne armee vers Orleans, où eſtoit le Prince, & voulans commencer à aſſaillir les villes tenues par les hu-

guenots, aduiferent estre meilleur d'aller premiere-  
ment assieger Rouen, & le Haure de Grace, afin d'ê-  
pescher la descête des Anglois, avec lesquels le Prin-  
ce negocioit, & deslors y fut enuoyé le Duc d'Au-  
male, avec puissance d'assêbler le plus de forces que  
il pouuoit: qui d'abord fit saisir le pont de l'Ar-  
che, afin d'empescher les viures qui pouuoient des-  
cendre de là à Rouen: puis ayant assiegé la ville, &  
commencé à battre le fort de S. Catherine (qui des-  
couure à plomb, & commande à icelle) il fut en fin  
contraint leuer le cāps pour la resistance de Moruil-  
liers qui y fut enuoyé par le Prince, & lequel entra  
dedans la ville, & aussi à cause qu'il fut aduertý de la  
confederation des reformez Normans avec les An-  
glois qu'ils deliberoient receuoir à Rouen, Dieppe,  
Haure de Grace & autres endroits, il s'alla saisir du  
Ponteau de mer, de Honfleur & d'autres places voi-  
sines. En quoy faisant il ne fit expeditiō petite, ains  
grandement necessaire.

Depuis le Comte de Mongommery entre dedans  
Rouen, à cause de quoy le Roy de Nauarre le va de  
rechef assieger, là où il est blessé d'un coup de mous-  
quet, dont il mourut peu apres,

Il est besoin que monsieur de Guise y aille, lequel  
non sans grands labeurs, apres l'auoir fait si furieuse-  
ment battre & assaillir, & hazardé plusieurs fois sa  
personne, iusques à aller luy-mesme à l'escalade lors  
qu'il se saisit du dessus de la porte S. Hilaire, le Roy y  
estant aussi en personne, Il print la ville d'assaut, &  
la remit en l'obeissance de sa Majesté, le 25. iour d'O-  
ctobre 1562.

Peu parauant que Rouen fust prinse, d'Andelot qui

estoit en Allemagne avec les forces qu'il y auoit leuees, leur donna le rendez vous à Baccara, bourg & Chasteau de l'Euesché de Mets, où se trouuerent la pluspart de ses troupes au premier iour d'Octobre, & deliberrit d'aller secourir Rouan: ce qu'il eust peu faire si deux occasions principales ne l'en eussent empesché: L'une qu'aucuns Reistres maistres samuserent sur les frontieres de Lorraine à prendre les cheuaux des paysans, pour accommoder leurs chariots; & l'autre que Monsieur de Neuers, Gouverneur de Champagne, & Brie, avec 15. Cornettes de hargoulets, & 25. enseignes de gens de pied, d'un costé: Et le Marechal de S. André, qui estoit à Troye, d'autre, avec aussi 9. compagnies de Gensd'armes, 13. de cauallerie legere, & les Legionnaires de Picardie, luy empescher les passages.

Ce qui fait que d'Andelot en estant aduertý & resolu de passer outre, prenant le chemin de Bourgongne, passa aisément la Seine, puis Yonne, à Creuen, & de là venant à Montargis, il se rendit à Orleans, vers le Prince, le 6. de Nouembre, ayant par le chemin amassé grand nombre d'alliez, qu'il ioignist avec ces troupes estrangeres: Et peu apres ayans donné ordre aux viures & autres necessitez pour faire marcher leur camp, ils s'acheminerent vers Paris: prennent Estampes, & viennent loger à Montrouge, Vaugirard, Gentilly, Marcueil, Cachan & autres lieux prochains, & par deux fois presentent la bataille aux Catholiques. La Roynemere parlant au Prince en vn molin à vent, près le faulxbourg saint Marceau, luy ouurit tous moysens de paix qu'il fut possible, neantmoins rien ne fust accordé. Le Prince tasche par deux fois, mais en vain, de force les



trenchees des faulx-bourgs de saint Iacques & saint Marceau estans bien deffendues par monsieur de Guise, lequel les auoit fait faire. Et scachant que quatre mille Espagnols auoient esté amenez par les sieurs de Maugiron & Tauanes, conduicts par les vieilles bandes de Piémont, sous leur Colonne le ieune Comte de Brissac; qui fut depuis tué deuant Mussidan, faisant en tout 24. enseignes de gens de pied, bien complètes, logez aux faulx-bours saint Iacques & saint Marcel; & lesquels dès le lendemain le deuoient aller attaquer, ce que monsieur de Guise feit faire sur la Diane, du costé de Gentilly, quartier du Prince Portien: Et craignant que les Catholiques ne tournassent leurs temporisemens, en quelques furieuses astagues, veu que toutes leurs forces estoient arriuees; partit le 10. de Decembre, & se retira à Palezeau, tirant vers Chartres. Ce pendant l'armee Catholique sortit de Paris costoyant, tousiours le Prince, afin qu'il ne se peust ioindre aux forces Angloises, qui estoient descendues pour luy en Normandie, & estoit barriere entre luy & les Anglois: & estant approchée du costé de Dreux iusques à deux petites lieues du Prince, au de là de la riuere d'Eure, l'occasion de la bataille se presenta: parquoy d'une part & d'autre se preparans à icelle, le 19. de Decembre, monsieur le Cónestable chef de l'armee Catholique, conduisant la bataillè, s'auançant le premier & mal à propos, est deffait & prins prisonnier. Et Monsieur de Guise considerant qu'après tels effort les Huguenots ne pouuoient auoir armes, ny la disposition pour eux ny leurs cheuaux à soutenir le choc de tant de gens frais & pourueuz

de tout le befoing ; ioinct qu'il ſçauoit que leur bataillon de fantaſſins François, eſtoit mal armé & deſpourueu de cauallerie pour les ſouſtenir , laquelle ſ'employoit à ſe r'allier, reſolut de mourir premier qu'il n'enfonçaſt l'ennemy, luy oſtant l'eſperance de la victoire laquelle ia il ſe promettoit: Pour ce, tirant deux cens cheuaux de ſes troupes, faiſant marcher vn bon nombre de harquebuſiers à ſa droite , & le bataillon des Eſpagnols apres , chargea de toutes parts ce bataillon de fantaſſins du Prince , leſquels il deſſeit & meit en routte avec la cauallerie qui le ſouſtenoit. Et au meſme temps le Mareſchal de S. André qui conduiſoit l'Auantgarde, chargeant auſſi l'ennemy , tomba priſonnier entre les mains d'vn Gentil-homme lequel l'auoit mis en croupe & eſperoit en tirer groſſe rançon: mais Baubigny le cognoiſſant luy donna d'vne piſtolade en la teſte. Le Prince peu apres eſt prins priſonnier par le ſieur d'Anuille: Et monſieur de Guiſe pourſuiuant toujours la victoire, eſtans reſté ſeul chef de l'armee , chargea de rechef l'Admiral , le Prince Portian & la Rochefoucaut, leſquels auoient r'allié leur cauallerie eſparſe par la campagne, & enuiron mille Reſtres, & le venoient encores attaquer; & adonc la rencontre y fut bien furieuſe, & mortelle à grand nombre de galands hommes, d'autât que le Duc de Guiſe pour mieux rompre ou allentir ceſte furieuſe deſmarche que l'Admiral faiſoit ſur luy , ſuiuant ſa premiere poincte, pres vn moulin à vent , contre le village de Maumontel , ſeit venir en diligence les autres ſoldats François, conduits par le Comte de Briſſac, Martigues & autres, qu'on n'auoit encores  
aperceü



apperceu ; pour ce qu'on les auoit fait mettre en bataille derriere la cauallerie : lesquels tirans incessamment contre l'Admiral , endommagerent plusieurs cheuaux & grand nombre de ses gens ; Et neantmoins ils ne peurent empescher que la cauellerie des Catholiques ne fut chargee par l'Admiral avec 200. cheuaux & 600. Reistres : mais elle soustint vaillamment ceste furieuse charge , & en fin contraignit l'Admiral à se retirer en haste , lequel les Catholiques ne peurent longuement suivre à cause de la nuit , & leur demeura le champ par la vertueuse conduite du Duc de Guise.

Ceux qui veulent mal à la reputation de cét heroi que Prince mettent en auant qu'il ne peut excuser d'auoir fait alte , & temporisé avec les forces qu'il commandoit , ce pendant qu'on enfonçoit monsieur le Connestable , chef de l'armee , avec l'artillerie , & qu'il valoit mieux se hazarder , prenant l'ennemy par le flanc , qu'attendant l'aduantage de le voir en queue souffrir vne si lourde perte : Mais outre ce que l'issue en tesmoigna , celuy qui en debattrá sans passion , confessera que le but & la vísée , non seulement d'un Capitaine , mais de chascun soldat , doit regarder seulement la victoire en gros , & que nulles occurrences particulieres , quelque interest qu'il y ayt , ne le doiuent diuertir de ce point là : Que si monsieur de Guise eust fait ce qu'ils veulent dire , il eust hazardé trop le reste , en danger de perdre le tout.

Je diray bien encores icy en passant , que l'enuie de la maison du Connestable , contre monsieur des Guise a esté par ce que son merite au fait des armes l'a fait plusieurs fois estre Lieutenant general du

Roy, & lors que le Connestable auoit tout gasté, lequel a quasi tousiours esté malheureux en ses entreprinſes, ne s'estant trouué en bataille qu'il n'y ait eu du pire, comme à Renty, à celles de sainct Laurens, Dreux, S. Denis & autres: Et au contraire monſieur de Guise a tousiours fait paroistre l'heur qui accompagnoit ses prouesses.

Les nouuelles de ceste bataille furent tost portees par les fuyards, tant à Paris qu'à Orleans, rapportans les vns & les autres que tout estoit perdu de leur costé, mais peu apres monſieur de Loffes arriuant à Paris, assura de la prise du Prince de Condé, & comme le Duc de Guise auoit tout radoubé, lequel ayant enuoyé au Roy & à la Roynie pour ſçauoir ce qu'il feroit de l'armee, il y fut ordonné, avec l'auis de la cour de Parlement, pour y commander, iusques au retour du Connestable, qui auoit esté mené prisonnier dans Orleans. L'Admiral ayant retiré le reste de son armee au pays de Berry, il y prend quelques places. Le Roy fait dresser 17. nouuelles compagnies de gens d'armes, & les vacantes furent pourueues d'autres Capitaines: Et pendant que l'Admiral faisoit ses exploits du costé de Solongne, le Duc de Guise étant en la Beauſſe, reprend Estampes & Pluuiers.

Le Roy & la Roynie mere partent de Paris, vont à Chartres, puis à Blois, & de là au Chasteau d'Orzain pres Amboise, où ils menent le Prince de Condé prisonnier. Les deux armées s'approchent d'Orleans, l'une pour l'assaillir, l'autre pour la deffendre, arriuant le Duc de Guise du costé de Solongne iusques à quatre lieues pres de la ville: l'Admiral d'autre part s'estant rendu à Orleans, avec toute son In-

fanterie & Cauallerie Françoisse , apres auoir logé ses Reistres à Gergeau. De là l'Admiral laissant d'Andelot, son frere, pour deffendre la ville , partit avec les Reistres, afin d'aller receuoir les Anglois à leur descente en Normandie , tant pour luy ayder à destourner le siege d'Orleans; si faire se pouuoit: que pour receuoir l'argent d'Angleterre & le deliurer au Marechal de Hessen, General des Reistres, comme on leur auoit promis. Monsieur de Guise sachant de quelle importance estoit la ville & Chasteau de Caen, y enuoya le Marquis d'Elbeuf, son frere , pour auoir l'œil sur l'armee de l'Admiral : & ce pendant s'approchant d'auantage d'Orleans, il prend le Portereau , faulxbourg de la ville : & quelques iours apres ayant resolu d'assaillir la nuit prochaine les Isles ioignantes la ville, que d'Andelot tenoit, il arriua qu'un nommé Iean Poltrot, sieur de Merey, à la suscitation de l'Admiral & des Ministres de la religion nouuelle, ainsi que monsieur de Guise sur le soir du 18. de Feurier 1563. (ou 64. comme nous contentons maintenant) retournoit à son logis fort peu accompagné, le suiuit de si pres qu'il luy tira , traistreusement, de six à sept pas sa pistole chargée de trois basles, pensant le frapper à l'espaule , au defaut du harnois, comme il feit, par ce qu'il l'estimoit armé par le corps: puis donnant des esperons à vn cheual d'Espagne sur lequel il estoit monté, meit toute peine à se sauuer ; mais le iuste iugement de Dieu l'en empescha, afin qu'un tel meurtre ne demeurast impuny. Voila comment ce Prince tant magnanime & qui auoit fait tât de deuoir à l'extirpation de l'heresie, mourut pour le seruice de Dieu, & du Roy & le



soulagement du peuple, au grand & indicible regret de tous les Catholiques.

Peu parauant que monsieur de Guise fust blessé, & lors mesmes qu'il faisoit ses dernieres entreprises on ne laissoit de parler de paix, laquelle peu apres sa mort fut conclue & arrestee à Amboise le 19. de Mars ensuiuant: & par icelle furent mis en liberté de part & d'autre, le Prince de Condé & le Connestable.

Ayant esté François de Lorraine, Duc de Guise, ainsi malheureusement tué par Poltrot, à la suscitation susdite, Henry, & Charles de Lorraine, ses enfans, l'un Duc de Guise auquel furent donnez les Estats du pere; & l'autre Marquis de Mayenne, encores ieunes, mais destinez aux armes & se vouans totalement au seruice de Dieu & du Roy cōme leurs predecesseurs en auoient monstré les effects, se retirerent pres la Majesté pour eux exposer à tous perils & hazards en executans ses commandemens: ce que tousiours continuoient aussi messieurs leurs oncles les Duc d'Aumale & Marquis d'Elbeuf, ainsi que ledit Seigneur d'Aumale le feit bien paroistre à la bataille de saint Denis, apres que le Prince de Condé s'estant voulu saisir de la personne du Roy, à Meaux, se seroit venu camper pres de Paris: ce qui occasionna les seconds troubles de l'an 67. Et cōme Plusieurs Princes & Seigneurs se meissent en deuoir de munir & deffendre les villes Catholiques & que monsieur d'Aumale fust party pour aller receuoir pour le Roy les forces du Duc de Saxe & du Marquis de Bade, Henry de Lorraine, Duc de Guise, voyant que les Huguenots mettoient le siege deuant Sés, se

diligēta d'y mener du secours de Troyes, où il estoit pour lors en son Gouvernement, ce qu'estant sceu par les ennemis & la resolution dudict Seigneur de Guise, neantmoins encores bien ieune, ils auisèrent de leuer le siege. Quelque temps apres ce genereux Duc de Guise, sçachant que les Huguenots faisoient descendre des Reistres, partit de Troyes, avec bonnes troupes, pour gaigner la Lorraine, afin d'empescher la venue desdits Reistres, auxquels il feit plusieurs algarades, comme par semblable le Duc d'Anmale son oncle. En fin s'estans passez diuers exploits de guerre entre les Catholiques & Huguenots, la paix est accordée deuant Chartres.

Le Prince de Condé ayant encores recommencé la guerre pour le fait de la Religion, monsieur d'Anmale au commencement de l'an 69. receut commandement de leuer vne armee à S. Iean, pres Sauerne, afin d'impescher le passage du Duc des deux Ponts, qui descendoit en France pour les Huguenots; auquel il feit de grands empeschemens en la Lorraine & en Bourgongne, & deffait le regiment du Capitaine la Coche, qui alloit pour fauoriser la descente du Duc susdit & du Prince d'Orenge: qui fut cause qu'ils ne peurēt ioindre les forces Huguenotes premier que le Prince n'eust perdu la bataille à Iarnac, où il fut tué. Monsieur de Tauanes donna les moyens de gagner ceste bataille, à quoy le Duc d'Aniou ne vouloit entendre, selon la conuiuence accoustumee avecques ceux de la Religion nouuelle, ou bien sa couïardise.

Les troubles continuans tousiours, s'estans jointes les forces d'Allemagne avec celles de l'Admiral, il

delibera d'aller assieger la ville de Poitiers, ayant entendu que le Comte de Lude, estant dedans, n'auoit forces suffisantes pour long-temps soustenir le siege. Desia les coureurs des Huguenots, partis de Lusignan, donnoient iusques aux portes, & le reste marchoit pour y planter le camp, occasion que pour le petit nombre qu'ils estoient en si grande ville, & le peu de munitions, la pluspart doutoyent de tenir ou de la rendre à composition: Mais la venue inopinnee du Duc de Guise leur leua entierement ce doute, qui y arriua le 22. de Iuillet (deux iours deuant que les Huguenots commençassent à dresser leurs escarmouches) avec le Marquis du Mayenne, son frere.

Aussi tost que le Duc de Guise fut arriué à Poitiers, il employa le reste de la iournee à visiter les murs, & pouruoir aux fortifications & deffences de la ville. A la reueüe de l'infanterie, ne se trouua que trois mille hommes au plus, tant bons que mauuais, & la ville bien peu garnie de viures: & neantmoins la valeur de ce magnanime Prince conduisit & encouragea tellement les assiegez par six semaines entieres, que dura ce siege, que nonobstant la famine y estant bien grande, il soustint toute l'aigreur des forces de l'Admiral, qui en fin fut contraint & par merueille à leuer le siege, avecques grande perte des siens.

Après le siege de Poitiers les Huguenots se retirās font leuer le camp que le Duc d'Anjou auoit pres Chastelleraut, & s'entrecostryans les deux armées au bas Poitou; se donna la bataille de Moncontour le 3. Octobre 69. en laquelle le Duc de Guise encores qu'il y fut blessé, feit grandement paroistre la vertu & magnanimité de son inuincible courage:



comme par semblable il feit peu apres au siege de S. Iean d'Angeli, & depuis en autres endroiçts iusques à ce que la paix fust arrestee le 8. d'Aoult 1570. monsieur d'Aumale estoit à ceste bataille de Mōcontour.

La plus part des chefs de ceux de la Religion nouvelle ayans esté tuez à la saint Barthelemy, le Roy fait publier par tout son Royaume qu'il n'entendoit qu'il y eust autre exercice de Religio, que de l'ancienne Catholique & Romaine : Et cōme ceux de la Rochele ne voulurent receuoir garnison, ny aucun Catholique pour leur commander; ains retirerent tous les Huguenots qui s'y voulurent refugier; & à leur exemple Sanxerre, Montauban, Nismes & plusieurs quartiers de Languedoc, Quercy, Dauphiné, & autres prindrent les armes pour mesme fin, A cause dequoy le Roy fait faire plusieurs preparatifs pour r'auoir les villes qui se liguoient en son Royaume, & apres auoir escrit plusieurs fois aux Rochelois qu'ils eussent à receuoir le gouuerneur qu'il leur enuoyoit, ce qu'ils refusent, Il dresse armées par mer & par terre pour les assieger. Durant ce siege, monsieur le Duc d'Aumale ayant grandement aidé à prendre les Isles & petits forts d'alentour, le 3. de Mars, 73. (comme les assiegeans & les assiegez ne taschassent qu'à se nuire par la furie de leurs canons) fut frappé de la balle d'une Moyenne, tirée de dessus le Cavalier du boulevard de l'Euangile, laquelle perçât vn gabion plein de terre, & prenât ce Prince à trauers le corps, le renuersa mort par terre: Ainsi ce magnanime Duc Gouuerneur de Bourgongne, laquelle il auoit tousiours conseruee en toute deuotion à l'obeissance du Roy, & apres auoir fait tant de deuoirs pour main-

tenir la foy Chrestienne, mourut au siege de la Rochelle, autant regretté des Catholiques, pour le lustre de ses vertus, qu'aurre mort de long temps auparavant luy. Monsieur de Guise y feit aussi merueilleusement paroistre l'affection grande qu'il auoit de remettre ceste ville à la deuotion de l'Eglise Romaine: mais celuy qui y commandoit en chef, n'auoit ceste deliberation.

Pendant ce siege les Ambassadeurs Poulonnois venus en France furent là y porter la couronne de Poulongne au Duc d'Anjou, lequel apres auoir fait mourir à credit, grand nôbre de vaillans capitaines & soldats, & perdu tant de munitions, se contenta au lieu de prendre la ville, de receuoir des rochelais quelques milliers d'escus, qu'il a dissipé avec beaucoup d'autres, en son beau voyage de Poulongne, à la ruine du pauvre peuple François.

En l'an 72. le Duc d'Anjou estant Roy de Poulongne, ceux de la religion nouuelle dressent diuerses entreprises pour embarrasser le royaume; l'aidans de monsieur le Duc, frere du Roy, qu'ils attirent comme ils peuuent. A quoy ils prennent courage de plus fort, lors qu'ils entendirent la mort du Tres-Chrestien-Roy Charles.

Messieurs de Guise font en sorte que la couronne est conseruee au Duc d'Anjou, & la luy mettent entre les mains à son retour, l'assistans de tous leurs moyens & seruices, le font sacrer & couronner en l'Eglise de Reims au mois de Feurier 72. par le feu Cardinal de Guise, oncle du dernier que ce Roy a nouuellement fait massacrer à Blois. Le Cardinal de Lorraine vrayement Catholique, duquel les bons offices



offices enuers la couronne de France ne se peuuent oublier, mourut peu parauant (plustost empoisonné qu'autrement) à Auignon; lors qu'il aidoit à donner entree en France au Duc d'Aniou.

Le Roy de Nauarre & le Prince de Condé, ayans seduit monsieur le Duc d'Alençon, frere du Roy, entretiennent tousiours les troubles pour cause de la Religion: Et allant le Prince mesme en Allemagne avec Thoré, le renuoya des premiers mener deux mille Reistres à mondit sieur le Duc d'Alençon (qui fut en Septembre 75.) attendant le gros de l'armee qu'il conduiroit par apres: Mais cōme il pensoit passer la riuiere pres Baccara; Mondit sieur de Guise veillant tousiours, en son Gouuernement, au deuoir de sa charge, & sachant que l'entree de ces Reistres seroit grandement preiudiciable au Roy, delibera par tous moyens de leur empescher le passage; ce qu'il feist, ayant deffait & mis en routte lesdits Reistres; contrainant Thoré à rebrousser son chemin vers le Prince: Mais il y fut griefuement blessé d'un coup de harquebuze en la iouë senestre.

Peu apres, la Royne mere voyant qu'il seroit bien difficile d'establir si tost vne bonne paix, & que la continue des troubles pourroit causer la totale ruyne du Royaume, pour la proximité des estrangers qui se preparoyent d'y entrer; ioinct que monsieur de Guise n'y pouuoit entendre estant fort malade de sa blessure, elle sauisa de rechercher Monsieur le Duc d'une tresue generale pour six mois, laquelle apres vn long debat fut accordée à Champigny le 22. de Nouembre dudit an 75. & le 14. de May, 76. l'Edict de paix fut publié au parlement de Paris.

Et peu parauant on aceroit l'appannage de monsieur le Duc d'Anion, à qui on promet l'assemblée generale des Estats, à Blois; laquelle pour ce on commande estre desmantelee: mais peu de chose y fut arresté, les Princes & Seigneurs Catholiques ne voulans tollerer deux religions en France: a cause dequoy les troubles recommencerent.

Au mois de mars, 77. le Duc de mayenne, Licutenant general pour le roy, en l'armee qu'il enuoya en Xaintonge, feit leuer le siege de mirambeau, & contraignant le Prince de Condé rappaser la Charente, se saisit du bourg de saint Savinian: & en Auril ensuiuant, prend Tonnay-Charente & Roche fort, se rendant maistre & Seigneur de la riuere de Charente, en moins de cinq iours. Puis ayant prins marans, par vne hardie & asseuree entreprinse il se presente en bataille à vn quart de lieuë des murs de la rochelle: là où il faulsa vn petit fort dit le Trueil aux filles. Ce fait & ayant laissé bonne garnison dedans marans, il alla faire quelque peu rafraichir son armee en Poiton. Et par ce qu'il ne luy restoit plus que Broüage à prendre, & les Isles, dont la rochelle peult auoir secours, n'estant son dessein de la battre, mais la bloquer par yn siege continuel, pour l'affamer, estant aydé de l'armee nauale dont Sanfac auoit la charge, Il delibera d'aller battre & assaillir Broüage, laquelle apres tres-grande et longue resistance il contraignit se rendre à composition. Et comme il estoit prest d'executer son entrepriuse pour le fait de la rochelle, la paix fut accordée à Poitiers au mois de Septembre de la mesme annee. 1578.

En Mars de l'an 80. ledit sieur Duc de Mayenne, conduisant vn camp pour le Roy en Dauphiné; là, non sans grandes peines & traux il remit par force en l'obeissance de sa maiesté les villes de Beauuais, Sainct Quentin & la meure, rendant tout le reste du pays paisible, au grand contentement de la Noblesse

Durant tout ce temps monsieur de Guise estant en son Gouuernement de Champagne & Brie, y prenoit tousiours garde, & auoit l'œil aux entreprinſes des Protestans; lesquels taschoyent de plus en plus, & par tous moyens de supplanter la religion Catholique: Et sachant que depuis la prix derniere le Prince de Condé, ayant quelques nouuelles intelligences & ligues secretes, en France, estoit allé en Allemagne capituler avec le Duc Casimir & autres pour leuer de nouuelles forces, le roy de Nauarre sollicitant d'autre part la royne d'Angleterre, afin qu'elle leur aydast de deniers pour cét effect, Il en aduertit incontinent le Roy, lequel il perceust conuiuer aucunement avecques eux: Pource, comme tres-fidele & tres-affectionné protecteur de la religion Catholique, ainsi que luy & ses predecesseurs l'ont tousiours fait paroistre, il aduise que tout ainsi que les Heretiques festoyent dès le commencement des troubles liguez ensemble afin de ruyner l'Eglise de Dieu, par plus forte raison les Catholiques pouuoient faire le semblable, pour les en empescher, & à ce que desormais la France ne fust plus protectrice des Heretiques, & qu'une seule religion Catholique y fust entretenu.



Ainsi meū d'un bon zele & pieté enuers l'Eglise de Dieu il fait vne association & sainte & necessaire de bōs & vrais Catholiques ; avec l'auctorité mesme du Pape qui en est le chef : pour de toutes leurs forces & moyens eux opposer constamment aux desseins des Heretiques & de leurs fauteurs ; remettre la France en son premier lustre & splendeur Catholique , & rendre le Roy paisible possesseur de tout son Royaume. Le conseil secret du Roy ( composé de d'Espernon & d'autres de pareille estoffe ) n'a pastrouuē ceste ligue bonne , par ce que l'heresie ne craint rien tant que l'vnion des Catholiques ; estāt sa ruine propre , & aussi qu'eux mesmes , Heretiques dissimulez , se verroient en fin & toute leur partialité bien esloignez de leurs pernicieuses entreprinſes , entre autres d'establiſſir un Roy Heretique en ce Royaume.

Et comme en l'an 84. ce bon Prince fust aduertey que la dissimulation du Roy au fait de la guerre contre lesdits Heretiques pourroit este cause de supplanter la Religion Catholique , d'autant qu'il y auoit de grands deniers à mets & en Allemagne que y auoient fait tenir le Roy de Nauarre , Prince de Condé , d'Espernon & autres leurs complices & aliez , pour faire descendre des forces ; S'aidant des moyens de la sainte Ligue , il fait aussi en ce pays leuer autres forces afin de s'opposer à leur entreprinſes , voire à celles qu'il sembloit que le Roy mesme conspiroit contre son tiltre de Tres Chrestie ; Neatmoins en attendant qu'ils commençassent il ne feit bouger son armee hors du gouuernemnt de Brie & de Champagne , lequel luy estoit commis. S'il eust

voulu lors, & q̄ ce qu'il faisoit fust pour s'éparer du Royaume, il pouuoit venir à Paris y trouuer le Roy qui n'auoit aucune armee, & avec le peu de deuotiō qu'ont ses subiets enuers luy, pour les auoir depuis douze ou treize ans tousiours rançonnez & tyrannisez, monsieur de Guise s'eust peu facilement saisir de sa personne; Mais tant s'en faut il n'y pensa iamais, comme on le veit bien. Car estant la Royne mere venuë le trouuer à Espernay, elle luy feit entendre que le Roy n'affectionnoit rien plus que d'exterminer les heresies de son Royaume & y mettre le Peuple en repos; & que pour ce faire il auoit auisé de cōuoquer tous les Estats, afin d'en deliberer & resoudre. Ceste ouuerture pleut grandement au naturel debonnaire de monsieur de Guise, il louë Dieu de la saine & sainte intention du Roy, & prie la Royne de l'entretenir en ceste deuotion.

Peu apres elle vient à Nemours où estoit ledict sieur Duc, & là elle luy renouelle ceste louable proposition du Roy, adioustant d'auantage qu'il desiroit luy mesme l'esclaircir de tous les doutes qu'il pouuoit auoir que sa Majesté ne voulust entendre à l'extirpation des heresies, & au soulagement & repos du peuple: Ce pendant elle y fait publier vn Edit, comme de pacification de troubles.

Le lieu auquel monsieur de Guise deuoit aller trouuer le Roy fut designé premierement à Fontaine-Bleau, puis à Melun, & en fin ce fut à saint Maur des Fossees. Là sa Majesté le receut assez courtoisement (au moins en apparence) toutesfois ceux qui voyoient bien clair, y apperceuoient quelque simulation. Monsieur de Guise y allant rondement, se fiant en son



roy & ne pouuant croire qu'il eust intelligēce avec les ennemis de soy-mesme, qui ne desirent sinon sa mort, Luy remonstre ouuertement les presages qui menaçoient en bref la subuersion de l'Eglise & de son Estat. Alors le roy luy iure & promet, qu'il n'auoir rien de plus cher que d'y donner ordre tant promptement qu'il luy seroit possible, & pour ce le prie d'y vouloir aussi tenir la main.

Par cēt Edict de l'an 85. le roy s'estant associé avec la Ligue des Princes Catholiques, promet de bailler des forces qui se ioindroient avecques eux, pour aller contre les Herétiques en Poitou, y soulager son pauvre peuple, & rendre le pays en l'obeissance deue. mais au lieu de ce faire, afin d'interrompre vn tant bon desseing, d'Esperson & luy enuoyerent des compagnies en Picardie : Grillon se iette dedans Boulongne, qui fait mine de vouloir attaquer les Princes Catholiques. L'on enuoye se saisir de ceux qui tenoient, pour monsieur d'Aumale, le Chasteau de mouy, & en fait-on mourir quelques vns à Senlis, & on permet que mouchouuaire, & autres Huguenots des plus signalez poursuient publiquement contre eux. Ce pendant le roy de Nauarre rauage tout en Guyenne, y commit infinies cruauitez à l'encontre des Catholiques, & en oste la superintendence au roy.

Et comme ceux de la religion nouuelle, haraſſoyēt ainsi tousiours les Catholiques en Guyenne & au Poictou, le roy se voulant peu à peu deffaire des chefs des Catholiques, enuoye monsieur de Ioyeuse en ce pays, à fin qu'il n'en reuinſt, ainsi que la tragedie nous l'a fait voir appertement. De mesme en a il

pensé faire de monsieur de Mercœur , & en mesme temps de monsieur de Guise: Car les aduertissemens que tant de fois il auoit donné au Roy , de la leuee de gens de guerre pour les Huguenots , en Allemagne, venans à paroistre; le Roy le pensoit aussi faire accabler , avec tous ceux de sa maison à vn mesme coup, par ceste armee , premier qu'elle eust passé la Lorraine ou son Gouvernement , auquel il luy mada prendre bien garde , & qu'il luy enuoiroit forces & argent, ce qu'il ne feit.

Monsieur de Guise toutesfois ne pensant à telle trahison, sinon, y allant (comme on dit) à la franche marguerite , auoit volonté de deliurer le Royaume de ceste vermine d'estrangers, & y empescher totalement leur dessein, qui estoit d'y planter vniuersellement leur Religion nouvelle.

Il leur donne toutes les secousses qu'il luy est possible, & en fin avec tant peu de gens qu'il auoit, il met miraculeusement en pieces & en fuite le reste de ceste armee , montant au commencement à plus de quarante mil hommes. Mais comme il n'y a iamais trahison qu'on n'éperçoine en fin quelque chose, la cause pour laquelle le Roy par son d'Espèrnon feit reconduire le peu de reste de ceste grande troupe fuyarde, leur faisant presents & banquets , En a bien fait cognoistre la verité.

Il est impossible que la France ny le Roy mesmes eussent iamais peu rendre à ce magnanime Duc graces cōdignes de tel bon office: car, sans doute, n'eust esté cét exploit d'Auneau, le Roy de Nauarre eust en fin happé, s'il eust peu , la couronne , & les Catholiques eussent eu grandement à souffrir: ioinct que la

destruction qu'eust fait par tout ceste truandaille d'Allemagne, après tant de chertez de viures en ce Royaume, eust esté non rengreger la maladie au patient, ains le suffoquer & luy donner la mort.

Au retour de la deffaitte d'Auneau & de ce qui estoit ensuiuy depuis, Monsieur de Guise après tant de peines & traux s'en retourna quelque peu rafraichir en son Gouuernement: & comme (auec les Princes Catholiques vnis ensemble pour la deffense & reestablissement de l'Eglise & religion Catholique en cét estat) il n'estimoit rien estre plus nécessaire que de passer en Guyenne & y assouir de tous poincts la guerre encommencee contre les heretiques (ainsi que le Roy faignoit le desirer) d'Espéron ne craignant rien tant sinon celà, fait tout à propos naistre quelques difficultez legeres, enuoyant des garnisons en Picardie, sçachant que le pays ne l'endureroit, & que la difficulté de cét affaire feroit inutilement consumer le temps plus propre & commode à la guerre, & que les Princes ne passeroient en Guyenne. Et non content de cét artifice il aduise auec le Roy, Biron, d'Aumont, de Rets, d'O, d'Intenille & autres de pareille bigarrure, de faire prendre & executer à mort six vingts des plus notables personages & plus affectionnez Catholiques de Paris, sous couleur de dire qu'ils estoient perturbateurs du repos d'icelle, & s'entendoient auec Monsieur de Guise pour la saccager & perdre; Et à ceste occasion ils donnent ordre de faire entrer dans ladite ville, quatre mille Suisses & quinze Enseignes de gens de pied, au mesme temps que l'on voudroit mettre la main sur lesdits personages: afin que si le  
peuple



peuple (voyant trainer au supplice les peres, freres, enfans, parens & amis sans aucune forme de Iustice) ne se pouuoit tenir és bornes de la patience, la force demeurast aux executeurs des passions du Roy & de d'Espernon; Et ce pédant ils font publier sous main que Monsieur de Guise tasche d'enuahir l'Estat, que sa Maiesté se doit garder de luy, qu'il veut faire massacre à Paris, & donner le sac & pillage de la ville aux siens: afin que monsieur de Guise ne s'approchast pres de sa Maiesté, & n'empeschast ladite execution, laquelle se deuoit non seulement faire à Paris, mais au mesme temps en plusieurs autres villes de ce Royaume. Dont aduertty Monsieur de Guise, afin de retrancher, par la verité, le cours de tels mensonges, il vient avec huit gentils-hommes seulement trouuer le Roy dedans Paris, se soubsmettant du tout en sa puissance, pour l'asseurer confiance que il auoit non seulement des signalez seruices qu'il a faits à sa Maiesté, mais principalement de la sincere & droite affection qu'il auoit aussi portee & portoit à son seruice. Et Dieu voulut que le iour auquel Monsieur de Guise arriva dedans Paris c'estoit le iour mesme que se deuoit faire l'execution: mais estant retardee à cause de sa venue inopinée, fut différée à vn autre iour, pour enuclopper luy & les siens avec les autres, & que sa mort & massacre accompagnaist leur supplice. Et ainsi le 12. de May, de grand matin, ils firent entrer lesdits Suisses & soldats par la porte S. Honnoré, lesquels aussi tost se saisirent des places, comme il leur estoit commandé: Neâtmoins celà ne se peut si tost faire que ledit sieur de Guise n'en fust aduertty (lequel estoit dormant en son logis



en toute seureté) par quelques vns de ses amis; & lors tout le peuple vnanimement conspirans les vns avec les autres à leur salut, & ne plus ne moins que si la presence de Monsieur de Guise les eust desia tous asseurez d'estre hors de péril, courent aux armes, reçoient l'ordre & le commandement qu'il leur est enuoyé, dressent des barricades à l'encontre desdits Suisses & soldats, pour empescher, seulement, vn dessein tant mal-heureux. Aduint qu'un Suisse tua vn habitant, qui fut cause que les autres habitans chargent lesdits Suisses & en tuent aussi quelques vns, desarment le reste & font mettre les armes bas aux autres soldats François: Et lors Monsieur de Guise sortant de son logis, bien à propos, empeschia que les habitans ne missent en pieces tous lesdits Suisses & soldats, & feit en sorte qu'il n'y eut aucun meurtre ou pillerie, remerciant Dieu qu'il auoit peu donner vn clair tesmoignage de son integrité & de la sincerité de sa foy enuers le roy, à la grand honte & confusion de ses ennemis, & du mensonge qu'un peu au parauant ils auoient inuété contre luy: d'autant que au lieu d'appeter le sac d'une si riche & opulente ville que Paris, Dieu luy auoit fait ceste grace de s'estre ferm de luy pour empescher qu'elle ne fust saccagée, & la vie ostee aux plus notables habitans d'icelle.

Le Roy estant au Louure s'en alla vingt & quatre heures apres, mal content de n'auoir peu exccuter sa cruauté, le partement duquel Monsieur de Guise eust bien empesché s'il eust voulu, mais tant s'en faut qu'il n'y songea iamais, ains le laissa ache-miner librement là où il luy pleust, accompagné de ceux qu'il voulut emmener, sans en arrester aucun.

d'iceux; combien qu'il fust en sa puissance de les retenir tous.

Voilà vne partie des seruices & bös offices faits par Messieurs de Guise aux Roys, François, premiers Henry, 2. François, 2. Charles, 9. à & à Henry de Valois.

Depuis le susdit partement, afin d'estouffer sous l'assurance du repos & de l'ordre le feu de diuision qui se pourroit r'allumer parmy le peuple en vne si grande ville, si quelque occasion de ce faire demeureroit encores en estre, monsieur de Guise receut en ses mains l'Arcenal, la Bastille & lieux forts de ladite ville, & fait sceller les coffres des finances pour remettre & consigner le tout en la puissance de sa Majesté quand il luy plairoit: desirant en tout faire cognoistre au Roy, qu'il n'a iamais eu la moindre des mauuaises intentions dont les ennemis de l'Eglise l'onx voulu rendre odieux à vn chacun: ce que plus amplement il feit entendre à sa Majesté par les lettres qu'il luy escriuit incontinent.

Veñons maintenant à la recompense que cetyran pour luy & les siens, a fait aussi pour luy & les siens, à Henry de Lorraine Duc de Guise, & au Cardinal de Guise son frere, personne sacree & dediee à Dieu.

Le Roy s'achemina à Chartres, de là à Rouen, puis il retourna audit Chartres, où faisant entendre le grand desir qu'il auoit de faire tenir les Estats, ainsi qu'il estoit ordonné par son conseil, afin de remettre chascune chose en son ordre, & que de là resultast l'extirpation des heresies & le repos de son peuple; Il manda au Duc de Guise, son cousin & bon amy

(comme il disoit) de l'aller trouuer & de l'assister en vne si sainte & si iuste occasion, afin de luy doner conseil & rechercher avecques luy les moyens de remettre sus cét Estat, ja presque ruyné par ses gloutes harpies de mignons, & par autres sangsues de son conseil secret. Dequoy Monsieur de Guise fut infiniment ioyeux; & obeissant au commandement de sa Majesté, l'alla trouuer audit Chartres, avec peu de train, contre l'aduis de la plupart des siens. Par ce que les ennemis de la Religion Catholique & du Peuple luy vouloyent mal: sachans que comme auparavant il l'auoit bien monstre, Il deliberoit constamment en estre encores le Protecteur. De premier abbord il fut receu du Roy avec vn visage riant & vne façon qui promettoit beaucoup d'amitié: Et ayant entendu la deffiance que Monsieur de Guise pouuoit auoir, Il l'assura sur sa foy, que de sa part, des siens, ny de son sceu il n'auroit aucun mal ny desplaisir, ains à tousiours le conserueroit en ses Estats & dignitez, qu'il deliberoit mesmes d'accroistre, comme à son bon amy, cousin & allié; Et de là Monsieur de Guise l'accompagna iusques à Blois, où se deuoyent tenir les Estats; Et se fiant sur la parole du Roy & de la Royne mere, demeure sans aucun soupçon pres leurs Majestez. Les Estats peu apres s'y commencent, où pour la premiere harangue sa Majesté iura solennellement & en face de tous les Estats de conseruer inuiolablement la Religion Catholique, punir les Heretiques & soulager son peuple foulé par longues anneés. Iure aussi de maintenir & conseruer les Princes de la Ligue Catholique, les recongnoissant fideles Officiers & Sertiteurs de la



couronne : aduoüant leur ligue auoir esté sainement & sainctement entreprinse, de laquelle, pour cõ occasion il se declara Chef, apres le Pape : mesmes aussi il aduoüa que les Barricades à Paris auoyent esté bien faites, pour obuier au faux entendre & conseil pernicieux.

Et certain temps apres pour mieux paruenir en trahison qu'il auoit conspiree, par auctorité des Estats il declare le Roy de Nauarre criminel de la Majesté diuine & humaine, & inhabile de succeder la couronne de France, pour les causes assez notoires vn chacun. Du depuis il fait tousiours tenir les Estats en longueur, brassant & machinant par ses artes menées le moyen de destruire & exterminer toute la maison de Guise, & semblablement tous les reus, allies & confederez d'icelle : par ce qu'ils estoient liguez pour la deffence de la Religion Catholique, & le soulagement du pauvre peuple opprimé & outragé : laquelle Religion Catholique le Roy par ses intelligences avec le Roy de Nauarre & avec autres estrangers auoit de long temps delibéré ruiner & amortir en France : mesmes ayant arraché la laine de ses subiets, les escorcher encore apres, scachant qu'il ne pouuoit auoir lignee, & par ce ne se soucioit que deuinist le reste quand il seroit mort : proposition veritablement digne d'un Epicurien ou Machiaueliste.

Et entre autres difficultéz qu'on feit souldre l'assemblee des Estats; il y en eust vne, Que le Roy contre sa promesse & traicté faict avec Messieurs Princes, & Seigneurs de la Ligue, auxquels la ville d'Orléans auoit esté baillée pour leur seurreté, ne se



ant pas qu'à d'Antragues, qui en estoit Gouverneur, il eust fait quitter la Ligue, neanmoins encores estoit-il que Dunes (qui s'estoit aussi separé de la Ligue) en fust Lieutenant en l'absence dudit d'Antragues, son frere, suivant les lettres qu'il luy en auoit expedier pour cét effect. A quoy les habitans de la ville s'opposèrent, se mirer en armes, & recognoissent que le Roy y procedoit d'une mauuaise ame, & ne s'en deberey, ayans eu la volonté de monsieur de Guise (vers lequel ils enuoyerent en diligence) de mettre en la ruiere, Gouverneur, Lieutenant, & de les rendre contraires à la Religion Catholique. Mais monsieur de Guise, par sa prudence, & bonté accoustumee appaisa les choses, & fait en sorte vers sa Majesté que la commission de Dunes seroit reuocée; Que d'Antragues, bien qu'il luy fust contraire, si qu'il l'a monstré par plusieurs mauuais effects) ne seroit Gouverneur, & qu'en son absence les habitants commanderoient à la ville. Ce qui ne fut sans plusieurs grandes contestations. d'autant qu'absolument le Roy, au preiudice dudit traité, vouloit avoir ceste ville; Et disoit que jamais il n'auoit entendu leur auoir laissé Orleans. Mais quand il veyoit le traité, & que Orleans y estoit fort bien écrit, & nect qu'il n'estoit pas ignorant qu'il fust ainsi: il commença à dire: ç'a esté Villeroy qui m'a trompé, & a mis Orleans au lieu de Dourlans: Et deslors douloureusement de veoir ce qui est arriué depuis, & les moins sages recogneurent de quel pied le Roy y marchoit.

Il y eust aussi vne grande contestation pour auoir rabbaïs des tailles, lesquelles au cōtraire sa Maje-

sté vouloit augmenter : mais comme il veit que Estats estoient resolu d'obtenir chose si iuste & raisonnable pour le peuple, il le leur accorda : meurant toutesfois en ceste volonté, de leur cōseiller Messieurs les Princes Catholiques, s'asseyant puis apres il les scauroit bien dompter, & qu'il feroit ainsi que feirent les Loups des Brebis, ayans osté les chiens qu'ils auoient pour leur garde.

En fin ne pouuant plus tenir la rage qui l'oppressoit, l'enuie & le despit desquels il bourreloit son ame (pour voir les Princes Catholiques s'opposer ses pernicious d'esseins, embrassans la cause du Peuple, & le Peuple honorer ses conseruateurs) & excité par plusieurs lettres de d'Espernon, il se resolut d'exccuter ceste damnable, inhumaine & que barbare volonté. Mais deux iours auparauant qui estoit la veille de saint Thomas; Messieurs de Bois-dauphin, Brissac & plusieurs de la Ligue eurent quelque aduertissement que l'oyseau vouloit à eux, & sur tout à aucuns des principaux Deputez; afin d'interrompre le cours des Estats, lesquels le Roy & tous les siens ne desiroient sortir en effect ainsi qu'ils estoient commencez, speciallement à cause qu'il ne vouloit pas qu'il y eust rabais de la loy, ny que la loy fondamentale du royaume, celle du Roy de Nauarre eust lieu; De sorte qu'ils furent en armes toute la nuict, à cause de quoy le lendemain matin y eut vne grande rumeur par le Chastel pour l'alarme qu'ils auoient eue. Ce qui occasionna Monsieur de Guise avec les rapports qui luy furent faits, de dire au Roy qu'il auoit eu aduertissement qu'il luy vouloit mal, ainsi qu'il luy auoit dit.

autres fois auparauant. Et lors le Roy luy res-  
 pondit : Mon Cousin, croyez-vous que i'aye l'ame si  
 meschante que de vous vouloir mal? Au contraire ie  
 declare qu'il n'y a personne en mon Royaume  
 que j'ayme mieux que vous, n'y a qui aussi ie sois plus  
 content, comme ie le feray paroistre par bon effets auant  
 qu'il soit peu (ô quels effects! pour vn Roy qui se dit  
 chrestien.) Assurant ce qu'il disoit avec beau-  
 coup de sermens, & sur la reception du corps de no-  
 stre Seigneur qu'il deuoit receuoir cè mesme iour:  
 si il feist. Voilà bien cacheté vne trahison avec  
 le corps de Iesus-Christ! Cèla feist que  
 le sieur de Guise ne se voulut arrester d'avan-  
 t pour descouurir la verité des rapports qui luy  
 auoient esté faits: & que, comme ce iour mesme de  
 saint Thomas, au soir, monsieur le Cardinal de Guise  
 apprit qu'il auoit sceu de bonne part que le Roy  
 feroit vn mauuais office; Il luy feist response que  
 luy venant de ses cōptes ordinaires, & qu'il ne se pou-  
 uoit persuader que le Roy eust l'ame si meschante  
 que luy vouloir faire desplaisir, veu qu'il ne luy  
 auoit iamais donné les occasions. La nuit dudit  
 jour de saint Thomas il entra grand nombre de  
 gens dedans la ville, tant à la deuotion du Roy,  
 que de ceux de sa faction, pour tousiours se fortifier.  
 Le lendemain au matin le Roy feist amener son carro-  
 ssé au Chasteau, feignant qu'il sen vouloit aller pro-  
 mener, & manda monsieur de Guise, luy faisant en-  
 tendre qu'il auoit quelque chose de consequence à  
 communiquer.

FIGVRE

49

POVR TRAICT DE MONSIEVR  
de Guise, estant vif.



Le Roy feit de mesme à l'endroiect de Monsieur  
le Cardinal de Guise : tellement que ledit sieur Duc  
de Guise arriuant le premier (par ce qu'il estoit logé  
dans le Chasteau) pour aller trouuer le Roy en son  
Cabinet, à la façon accoustumee, il laissa tous les  
Seigneurs & Gentils-hommes ordinaires de sa suite  
dedans l'antichambre ; Et comme il fust dans le por-  
che, entre ladite antichambre & ledit Cabinet, il  
trouua (comme l'accoustumé) quatre des Quarante  
cinq, salallites du Roy à gages, dans ledit porche  
lesquels il commença à considerer : toutesfois ne se



doutant d'aucune trahison il sauua pour entrer audit Cabinet, duquel l'un desdits Quarante-cinq leua la tapicerie, où ledit Sieur rencontra encores trois autres desdits Quarante-cinq à son opposé à la porte dudit Cabinet. Et lors tous ensemblement se ietterent sur luy, l'un luy saisissant son espee, les autres le frappans de diuers coups de poignards: Et le premier qui le frappa fut la Bastide, d'un coup à la nuque du col, vn autre pardenant dans la gorge (pour le doubte qu'ils auoyent qu'il ne fust couuert) autres deux de chacun vn coup dans le dos, & encores autres deux dans l'estomach: ce qui fut cause qu'en mesme instant ledit sieur de Guise tomba par terre, ainsi que vous le voyez cy pourtrait en la page suivante. Et en tombant l'escria haut, de sorte qu'il fut ouy par tout le Chasteau, disant: O Dieu est-ce pour mes pechez! Incōtinent lesdits Quarante-cinq luy osterent son espee, ses pendant d'oreille & anneaux fort precieux qu'il auoit aux doigts: Et aussi tost le Roy qui estoit dās son cabinet, avec Loignac, ayans chacun l'espee nuë, sortit pouissant ledit sieur de Guise avec le pied, pour sçauoir s'il estoit du tout mort.

Au mesme instant Monsieur le Cardinal de Guise qui estoit logé hors du Chasteau, à cause qu'il n'estoit là comme Prince, ains comme President aux Estats, entra audit Chasteau, & alors on cria l'allarme, de sorte que les portes du Chasteau furent fermées, toutes les gardes courans çà & là avec les armes. Le Marechal d'Aumont assisté de plusieurs d'iceux vint au deuant dudit sieur Cardinal, luy disant qu'il le faisoit prisonnier du Roy, &

REPRESENTATION DE LA CRUELLE ET BARBARE  
compense, pour tant de bons offices qu'ont fait ce magnanime Duc & ses Prede-  
cesseurs à la Couronne de France: par vn Henri de Valois.



que s'il bransloit qu'il le tueroit, & le conduisit de ce pas au Roy: lequel luy monstrant ledit sieur de Guise mort estendu sur la place, luy dit qu'il luy en pendoit autant deuant les yeux. Adonc monsieur le Cardinal luy respondit, Qu'il ne desiroit viure d'auantage, son frere estant ainsi mal-heureusement assassiné, & que c'estoit mal recongnoistre les seruices signalez qu'il auoit fait à la Couronne: Et aussi tost il fut mené prisonnier en vne chambre dudit Chasteau, avec gardes; Ce pendant l'allarme sonna à la grande Eglise de la court dudit Chasteau. Monsieur le Cardinal de Bourbon fut mené deuant le Roy, qui l'appella Marotte, Viel fol & Sotte-teste, & luy monstrant aussi ledit sieur de Guise mort, luy dit: N'estoit vostre vieil aage ie vous en ferois faire autant, encores ne sçay-ie ce que ie f'ay, vous voulez estre la seconde personne en mon Royaume, vous le meritez fort bien, ie vous feray si petit que rien plus: & l'enuoya aussi prisonnier en sa chambre, avecques gardes. Le Roy alla de ce pas trouuer la Royne, sa mere, à laquelle il dit assez rudement; Madame, maintenant ie suis seul Roy, j'auois vn compediteur en mon Royaume qui est mort. La Royne luy respondit: Sire Dieu vueille que vous ne vous repentiez point de ce que vous avez fait. Alors il repliqua: Madame, I'y ay si bien pourueu que ie ne m'en sçauois repentir, estimant ainsi qu'il en auoit donné charge que messieurs du Mayenne & d'Aumale fussent semblablement tuez: & que Orleans d'eust estre incontinent à sa deuotion, comme d'Antragues le luy promettoit, & aussi qu'il estoit asseuré par les Comtes de Soissons, Mareschal de



Rets, d'Antragues, Dunes, Lauerdin, Renty Rambouillet, Do, Daumont, Larchant & plusieurs autres que ces Princes estans morts, messieurs de Paris ne feroient sinon sa volonté, a l'exemple desquels se conformeroyent ceux des autres villes.

Monsieur de Ioinuille qui estoit à la chambre de Monsieur le Grand-Prieur, oyant crier l'alarme, se doutant ce que ce pouuoit estre, commença à deualer les degrez du Chasteau, en mettant l'espee au poing, disant; Je voy bien que c'est à ce coup qu'il faut mourir: Mais aussi tost il rencontra sur lesdicts degrez sept ou huit Archers qui luy presenterent les halibardes, & aussi tost fut saisi par derriere par ledit sieur Grand-Prieur, & ramené en sa chambre prisonnier entre les mains desdictes gardes; lesquels luy faisoient entendre que son pere, ny pas vn autre auoient aucun mal: trop bien qu'ils estoient arrestez & auoyent gardes en leurs chambres, comme luy, & ce pour euitier qu'il ne suruinst quelque sedition, à cause que le Roy s'estoit saisi des personnes des Preuost des marchâs & Escheuins de Paris, lesquels il vouloit faire punir, pour quelques offences qu'ils auoient commis à l'encontre de luy: Et par ainsi ledit sieur de Ioinuille demeura huit iours sans scauoir la mor: de son pere.

Monsieur de Nemours & monsieur d'Elbeuf, logez audit Chasteau, furent aussi arrestez, côme Monsieur l'Archeuesque de Lyon, Pericard, Besme page, & vne infinitez d'autres estans de la suite dudit sieur de Guise.

Quant ausdits sieurs de Nemours, & d'Elbeuf, ils lamentoient fort la mort de Monsieur de Guise,



se plaignans appertement & hautement des trahisons, perfidies, cruautéz & inhumanitez barbares du Roy. Et comme à quelque heure de là le Roy leur mandast qu'ils eussent à se taire & qu'il leur donnoit la vie sauue, Ils firent responce que le plus grand desplaisir que le Roy leur pouuoit faire, c'estoit de les laisser viure apres la mort dudit sieur de Guise, & que si iamais ils sortoyent ils se vengeroient de telle trahison: Tellement que le Roy manda, en particulier, ledit sieur de Nemours en son cabinet, & luy dit: Nemours, le vous donne la vie: Mais ledit sieur de Nemours luy fit la mesme responce qu'il auoit faite auparauant, Que le plus grand desplaisir qu'il luy eust seu faire, c'estoit de le laisser viure, & qu'il n'auoit point eu d'occasion de traiter si inhumainement son frere, luy ayant mis & maintenu la couronne sur la teste. Alors le Roy luy dit qu'il estoit vn causeur, & que puis qu'il vouloit mourir, qu'on le feroit mourir, & le rentoya avecques ses gardes.

Cependant le Preuost de l'hostel assisté de ses Archers, s'en alla à l'hostel de ville, en plaine assemblee du tiers Estat, se saisir des personnes de Messieurs le President de Nully, Preuost des Marchans: Compan & Cotteblanche, Escheuins & deputez de la ville de Paris: du President d'Amiens, député de ladite ville, & quelques autres dont il auoit vne liste, qui fut cause que le reste des deputez estās là furent infiniment estonnez: les vns prests à se ietter par les fenestres. Et encores que le Preuost de l'hostel leur dist qu'il auoit charge du Roy de leur commander qu'ils ne bougeassent de là, & qu'ils travaillassent à leurs cayers, Ils ne laisserent si tost qu'il

iufques aux caues & les autres s'enfuyans : de façon qu'il y en eut plusieurs qui allerent avec leurs grâde robbes de taffetas iufques à Orleans, Baugécy & autres lieux, à trauers les bouës : par ce que ce iour là il ne cefla de plouuoir fi habondammét en ladite ville de Blois, qu'il sembloit eſtre vn ſecond deluge, & toutesſois (choſe admirable) à deux lieuës de là, & preſque par tout ailleurs, il neigea & gella bien fort.

Larchant avec ſes autres Archers alla auſſi au Palais, & là il ſe faiſit des perſônes de Meſſieurs de Briſſac & Boiſdauphin, de quelques autres de la Nobleſſe, auſſi en plaine aſſemblée dudit Eſtat,

Auſſi fut prins le Conte de ſainct Aignan, Guidon de la Compagnie de Monſieur de Ioinuille, & incontinét apres renuoyé en ſon logis. Il trouua moyé d'eſchapper avec vn meſchant cheual de bas, & de rechef le Roy enuoya pour le prendre : Mais l'on trouua qu'il auoit choiſi le plus ſeur. Qui eſtoit de ne ſe fier à l'infidelité meſme.

Durant ce téps, les gardes logees aux fauxbours : qui auoyent le ſignal du toxin, entrerent dedans la ville, tous en armes, & ſe rendirent maiſtres des portes : aucuns deſquels furent poſez en ſentinelles & corps de gardes en diuers quartiers de la ville, les vns par le Mareſchal d'Aumont, les autres par Larchant, autres par Renty, autres par Montigny.

Auſſi fut enuoyee garniſon au logis du Preuoſt des marchans, & furét tous ſes papiers faiſis: de meſme fut fait chez Monſieur Pericard, où furent trouuez tous les papiers & chiffres de Mōſieur de Guiſe.

Semblablement fut enuoyee garniſon & ſe faiſir de tous les meubles de Meſſieurs de Guiſe & du

Cardinal son frere lesquels de puis le Roy a fait vendre & ena pris les deniers.

Tous les chefs estans, ainsi arrestez, encores qu'il y eust plusieurs personnes affectionnees à la Ligue; comme aussi vne bonne partie des habitans de la ville, Il ne fut possible que ceux de la Ligue, estans ainsi surprins, peussent faire aucune assemblee pour resister, comme ils auoyent la volonté: & ceux qui eurent moyen de sortir si tost qu'ils ouirēt l'allarme, se monterent sur plusieurs cheuaux qui estoient au faulx-bourgs, & s'en allerent promptement, la plupart dans Orleans

Monsieur le Cheualier Breton fut le premier qui en porta les nouuelles, pour autant que ce iour il deuoit partir, pour s'en venir à Paris; & lors que l'on cria l'allarme il ne faisoit que de prendre congé de Monsieur de Guise, en sorte que comme l'on ferma les portes du Chasteau il en sortoit seulement: & ayant trouué son cheual, l'attendant au pied des degrez, il monta & fait diligēce pour aduertir ceux d'Orleans, ce qui apporta vn grand aduantage pour ceux d'Orleans & pour tous les Catholiques, qui fut cause que d'Antragues & Dunes, accompagnez de trente à quarante cheuaux, qui auoyent promis de mettre aussi tost la ville à la deuotion du Roy, voulans sortir & faire diligence pour aller surprendre ledit Orleans, & à demye lieue de là estans aduertis que ledit sieur Cheualier couroit auant eux, Ils chargerēt de dessein & retournerēt trouuer le Roy, pour luy dire qu'ils ne pouuoient estre les premiers à Orleans, & qu'il n'y falloit plus aller qu'avec des forces: l'assurant que ceux dudit Orleans s'en seroient mis



mis en armes, ayans eu le dit aduertissement: ce qu'ils firent, & si bien à propos, qu'ils semble que Dieu l'eust voulu expressement, afin d'empescher les mauuais & pernicieux desseins du Roy, allencontre de Paris: où les Catholiques ont eu occasion, temps & moyen pour eux armer pour resister aux tyrannies du Roy: ainsi qu'ils en sont fort bien deliberez.

Peu apres le Roy feit sonner à son de trompe, & par deux fois, que aucun des Deputez & autres desdits Estats ne fussent si aulsez de s'en aller qu'ils ne fussent paracheuez; ains qu'ils eussēt à les cōtinuer, en peine à ceux qui s'en yroyent d'estre declarez criminels de leze Majesté, & punis comme tels.

Peu apres le Roy remit en liberté lesdits sieurs de Brissac & Boisdauphin, apres leur auoir fait iurer de ne porter iamais les armes pour la Ligue.

Aduint ce iour mesme, par vne grace speciale de Dieu (comme le Roy eust de long temps preuen à sa mal-heureuse & damnable conspiration de faire mourir en mesme temps tous les Princes lesquels estoient protecteurs de l'Eglise) Que Dom Bernardin de Mendoça, Ambassadeur pour le Roy Catholique, enuoya en toute diligence à Lyon, aduertir Monsieur de Mayenne d'une si insigne & execrable cruauté, afin qu'il sauuaist sa personne, & se tint sur ses gardes. Le courrier de l'Ambassadeur feit tant grand deuoir, qu'il arriua vne heure ou deux auant celuy du Roy, qui portoit lettres à Gadagne Seneschal de Lyon, & aux habitans de ladite ville; par lesquelles sa Majesté leur commandoit expressement qu'ils eussent à se saisir de la personne dudit Sieur de Mayenne: Et peu apres couroit Alphonse Corse, qui

H



auoit charge de l'assassiner. Ce qu'il auoit malheureusemēt deliberé de faire, nonobstant que deux iours auparauant il eust esté deux heures entieres avec Monsieur de Guise, luy iurant & periurant toute fidelité, seruices, deuoirs & amitez. Mais iceluy sieur du Mayenne, comme tres-aduisé qu'il est, si tost qu'il eust receu l'aduertissement, donna de mesme temps à ses affaires & laissa ladite ville : d'autant qu'il sçauoit bien qu'il y en auoit aucuns en icelle qui luy estoient mal zelez, & qu'il n'estoit pas besoin de hazarder sa personne en temps si calamiteux; & laquelle fait infiniment besoin, tant pour le support de l'Eglise, & de tous fideles & bons Catholiques; que pour (avec l'ayde de Dieu) tirer raison du sang iniustement respendu, qui en demande la vengeance : de sorte qu'il donna ordre de luy mener quelques cheuaux hors de la ville; & faignant de aller promener avec le sieur d'Alincourt (gendre du deffunct Seigneur de Mandelot) sorty de ladite ville, apres luy auoir dit le meurtre commis en la personne de son frere, il monta à cheual & sen alla droit en Bourgongne donner ordre aux places de son Gouuernement. Ce qu'il a fort bien sçeu faire; l'ayant rendu en deuotion de maintenir la religion Catholique.

De mesmes pensoit le Roy faire assassiner à Paris Monsieur le Duc d'Aumale, ce que Dieu n'a permis, le reseruant pour le grand besoin que les Catholiques auoient de luy en icelle.

La deliberation du Roy estoit aussi, que apres estre aduerty de la mort de ces deux Princes, faire aussi tost massacrer les autres qu'il tient encores pri-

sonniers.

Semblablement Seguin de la maison de monsieur de Guise, sçachant que le Roy s'estoit informé & auoit appris où estoit le sieur de Mondreuille, fort aymé dudit Seigneur de Guise, & l'un des premiers de son cōseil (pour estre genereux, sage & tres-aduisé, bon Catholique, zelé à la tranquillité de l'Eglise, soulagement & repos du peuple) Et que le Roy escriuoit à son occasion au Lieutenant du Chasteau de Caen, afin de l'arrester, il aduertit ledit sieur de Mondreuille si promptement, & avec vne tant extreme diligence, qu'il porta premier les nouuelles audit Caen: à cause dequoy ledit sieur de Mondreuille se retira en son Gouuernement à sainte Menhoust, qu'il garde pour le support de l'Eglise, & faire teste aux Allemans lesquels par là pourroient venir pour le Roy, à l'encontre des Catholiques: par ce que la descente des Reistres, est ordinairement en la terre de Beaulieu, qui est ioignante ce Gouuernement.

A l'instant de la mort de mondit sieur de Guise, les plus aduisez à la Cour disoyent que la Royne mere ne viuroit plus gueres: d'autant que le Roy festoit imprimé qu'elle aymoist monsieur de Guise, & qu'elle estoit chef & auoit aydé à pratiquer la Ligue.

Le Roy aussi se plaignoit infiniment de ce, que madame de mont-pensier (sœur dudit sieur de Guise) n'estoit point à la Cour, afin de la faire mourir: & ne pouuoit pas celer en ses affections effrenées qu'il la haysoit à mort, & plus que ledit sieur de Guise.

Le lendemain à 9. heures du matin le Roy feit signer à monsieur le Cardinal de Guise vn certain pa-

pier, & enuiron sur les dix heures, ce pendant qu'il alloit à la messe, il commanda aux Quarante-cinq assassinateurs, d'aller tuer ledit sieur Cardinal; Aquoy ils respondirent qu'il estoit personne sacrée, & prièrent le Roy de les en excuser, veu qu'ils auoient fait sa volonté le iour auparauant. A cause duquel refus, le commandement fut baillé par sadite Majesté au Capitaine le Gad, qui enuoya six ou sept de ses soldats pour faire ce massacre; lesquels aussi tost s'en allerent trouuer ledit sieur Cardinal, auquel ils dirent qu'ils auoient charge de le tuer: & alors monsieur le Cardinal leur demanda vn peu de tēps pour penser à sa conscience, ce qu'ils luy accorderēt. Et eux estās à la porte de la chambre, ledit sieur Cardinal se mit à l'vn des bouts à genoux, faisant ses prieres; desquelles il estoit souuent inrerrompu, à cause que lesdicts soldats ne vouloient auoir tant de patience: Et en fin monsieur le Cardinal se leuant, & mettant son bras deuant ses yeux, il leur dit qu'ils feissent la volonté du Roy: Et à l'instant coururent vers luy, & luy baillerent plusieurs coups de hallebardes, desquels il tomba mort.

Madame de Nemours alloit souuent se ietter aux pieds du Roy & de la Royne mere, afin qu'on luy donnast les corps morts de ses enfans pour les faire inhumer; mais elle ne peut obtenir ce qu'elle demandoit: & au cōtraire de là à quelques iours le Roy reseruant les testes, les a fait embaumer, & les garde en son cabinet afin de saouler tous les iours ses yeux en son inhumaine cruauté: & les corps, apres les auoir laissé au Chasteau le plus qu'il a peu, & iusques à ce qu'ils estoient ja fort corrompus, rassasiant d'ordi-



REPRESENTATION DE LA CRUELLE MORT COMM  
en l'innocence de Monsieur le Cardinal de Guise, personne sacrée &  
dedice à Dieu, par Henry de Valois.





naire ses passions enragees à les regarder. Il les a  
faict porter au lieu dict les Galleries, les a faict  
mettre entre plusieurs buches de bois sec, & avec  
vne trainee de poudre & feu artificiel, conduite de-  
puis le Chasteau, iusques audit Bucher, luy mesme  
y a voulu mettre le feu: Et par apres estans ainsi ces  
corps bruslez & consommez, il en a fait ietter les cê-  
dres au vent. Ainsi en faisoient faire aux Chrestiens  
les Empereurs Diocletian & Maximian, craignant  
que les autres Chrestiens n'enfeuelissent les corps  
des bien-heureux martyrs, & que d'eux ne demeu-  
rast aucune relique.

Ce sont là les cruantez du dernier des Vallois, exe-  
cutees sur les pilliers de l'Eglise, pour remuneration  
de leurs fideles seruices: Ce que Dieu, qui hayt sur  
tout l'hommicide, ne laissera impuny, amortissant  
les conspirations faictes contre son Eglise & les Ca-  
tholiques de ce Royaume.

F I N.